

Jon

anêḡ kapya yaḡ

Abô môḡ

Aposeḡ Jon hato kapya êntêk. ḡê lôkawk enaḡ nena hato hadêḡ avômalô êvhaviḡ anêḡ malak te. Waklavôḡ êḡ ma kêdôḡwaga ewa Yisu anêḡ Abô Mavi ba i luvuluvu ma avômalô êvhaviḡ eyabiḡ thêlô. Ma doḡtom kêdôḡwaga abôyaḡ evenḡ haviḡ ba intu Jon hato ek thêlô neyabiḡ ḡê takatu ba esopa Yisu anêḡ abô avanôḡ iyom.

Hato kapya êntêk hadêḡ 85 lo 95 AD malêvôḡ doho la.

Jon hêv lamavi

¹Ya Biḡsu Jon ba yahato abô êntêk hadêḡ o avi atu ba Wapômbêḡ bôk halam yôv lôk nalumi.^a Yalenḡhaviḡ môlô hathak abô avanôḡ ba miḡ ya iyom ami. Mi, avômalô takatu ba eyala abô avanôḡ êḡ haviḡ. ²Abô avanôḡ êḡ hamô alalô kapôlôḡḡ ba tem êmô êtôm wak nômbêḡ intu sapêḡ ba intu yêlô leḡḡhaviḡ môlô.

³Kamik Wapômbêḡ lo Namalô Yisu Kilisi iniḡ wapôm lôk leḡḡhiki ma labali êmô imbiḡ alalô takatu ba amô abô avanôḡ lôk leḡḡhaviḡ kapô.

Nobaloḡ abô avanôḡ loḡ

⁴^bYahapôm nalumi doho atu ba esopa abô avanôḡ hatôm atu ba Wakamik bôk havak haviḡ alalô ba intu yalenḡmavi anôḡ. ⁵^cLivôḡ, lêk yahathô o lokwaḡ nena alalô leḡḡjimbiḡ i. Balabuḡ êntêk ba yahato ma miḡ lukmuk ami. Mi, môḡ anôḡ ma bôk alalô awa yôv. ⁶Ma leḡḡhaviḡ anêḡ ôdôḡ ma aêntêk nena alalô nasopa Wapômbêḡ anêḡ abô balabuḡ. Ma abô balabuḡ êḡ ma môlô bôk olaḡô hadêḡ môḡ anôḡ nena nombeḡ imbiḡ leḡḡhaviḡ.

^a **1** ḡê lôkawk doho enaḡ nena, “Avi lôk nali êḡ ma abô lôk kup ma anêḡ ôdôḡ nena avômalô êvhaviḡ anêḡ unyak mathêḡ te. Ma yaḡ lôk nali (2 Jon 13) ma hatôm unyak mathêḡ yaḡ.” ^b **4** 3Jon 3 ^c **5** 1Jon 2:7

⁷ Kêdôḡwaga abôyaḡ bêḡ anôḡ bôk i pik mayaliv ek nesau avômalô. Thêlô miḡ êvhaviḡ nena Yisu bôk habitak anyô ba halêm pik ami. Anyô anêḡ aêḡ ma anyô abôyaḡ lôk anyô hapôlik ek Kilisi. ⁸ Noyabiḡ am ek miḡ nônêm yak esak vuli takatu ba alalô adum ku hathak ek naja ami. Êḡ ma tem noja unim vuli mavi lôkthô. ⁹ Ôpatu ba hawa auk yaḡda ba miḡ havalonḡ Kilisi anêḡ abô lonḡ ami ma miḡ hamô haviḡ Lambô ami. Ma doḡtom ôpatu ba havalonḡ Kilisi anêḡ abô lonḡ hamô haviḡ Lambô lo Namalô. ¹⁰ Anyôla hayô ek môlô ba miḡ hawa abô êḡ ami, êḡ ma miḡ nônêm lemimmavi lôk noja yani thô ba unu unim unyak ami. ¹¹ Hôêv lemmavi hadêḡ yani, êḡ ma hudum ku kambom êḡ haviḡ yani.

¹² Abô bêḡ anôḡ hêk ek yanaḡ êndêḡ môlô, ma doḡtom yahadô ek yato êndôk kapya. Yaleḡhabi yasôk ek alalô nanaḡ abô imbiḡ i ek alalô leḡiḡmavi bêḡ anôḡ.

¹³ Mamuyaḡ atu ba Wapômbêḡ bôk halam yôv anêḡ nali^e êv leḡiḡmavi hadêḡ môlô.

^d 7 1Jon 4:1-3 ^e 13 Hatôm unyak matheḡ yaḡ anêḡ avômalô êvhaviḡ. Nôḡḡô 2 Jon 1.